

EDITORIAL

Mabuhay ang alaala ni Ka Joma! Palakasin ang Partido at isulong ang rebolusyon!

Natatanging parangal ang ibinibigay ng buong Partido at rebolusyonaryong kilusan kay Kasamang Jose Maria Sison (Amado Guerrero), tagapangulong tagapagtatag ng Partido Komunista ng Pilipinas, at pinakadakilang Pilipino at lider rebolusyonaryo ng nagdaang siglo. Sa mahabang panahon, si Ka Joma ang nagsilbing gabay at tanglaw, matibay na muog at sandigan ng Partido at rebolusyong Pilipino.

Si Ka Joma ay dalubhasa ng Marxismo-Leninismo-Maoismo, ang ideolohiya ng proletaryado. Pinangunahan niya ang muling pagtatag ng Partido at pagpapanibagong-lakas ng rebolusyong Pilipino. Sinuri niya ang saligang katangian ng malakolonyal at malapyudal na sistema sa Pilipinas, inilantad ang tatlong halimaw na imperyalismo, pyudalismo at burukratang kapitalismo na pangunahing umaalipin sa malawak na masang Pilipino, at itinuro ang landas ng pambansa-demokratikong

rebolusyon bilang daan tungo sa paglaya ng sambayanan mula sa kahirapan at kaapihan.


Lahatang-panig na pinalakas ni Ka Joma ang Partido. Tinuruan at sinanay niya ang libu-libong kadre ng Komite Sentral, mga sentral na organo at mga panrehiyong komite ng Partido, na namuno sa pagpapalawak at pagpapalakas ng Partido sa buong bansa. Pinangunahan niya ang pagpundar ng Bagong Hukbong Bayan noong 1969 at sinanay at ginabayang ang unang hanay ng mga

Pulang kumander at mandirigma nito. Pinamunuan niya noong 1973 ang pagtatatag ng National Democratic Front (NDF). Sa kanyang pangungulo, parang apoy sa kaparangan na kumalat ang digmang

bayan sa buong bansa.

Nang masakmal ng kaaway, siyam na taong siyang tinortyur sa bartolina ng mga pasistang ahente, subalit nanaig ang kanyang rebolusyonaryong diwa. Nakalaya siya nang nalansag ang diktadura ni Marcos na hinambalos ng mapangyarihang alon ng pakikibakang bayan at armadong pakikibaka.

Napwersang madistyero si Ka Joma noong 1987 matapos bawiin ang kanyang pasaporte para hadlangang makauwi sa bansa. Mahigit 35 taon siyang namuhay nang simple sa The Netherlands sa isang maliit na *apartment* kapiling ang kanyang pamilya, at sa kanlungan ng mga migranteng manggagawang Pilipino. Malayo man, malapit pa rin siya sa rebolusyong Pilipino at nakapagbigay ng matatalas na pagsusuri at napapanahong payo. Naging bentahe sa rebolusyonaryong kilusan ang kanyang pagkadistyero na nagbigay ng pagkakataon at panahong ibayong pagyamanin ang teorya ng rebolusyong Pilipino batay sa inaabot nitong praktika. Nang iligaw ang landas ng Partido, si Ka Joma ang liwanag na nagsilbing gabay para sa Ikalawang Dakilang Kilusang Pagwawasto.



Nagsilbi siyang pangunahing tagapayo ng NDF sa pakikipag-usapang pangkapayaan sa Gubyerno ng Republika ng Pilipinas (GRP) at mahusay na ginabayan ang pagbubuo ng makasaysayang mga kasunduang alinsunod sa layuning kamtin ang makatarungan at pangmatagalang kapayapaan. Kaya hindi siya tinantanang ng mga militaristang galamay ng imperyalismong US, na kontra sa pagpupunyaging lutasin sa usapan ang mga panlipunan at pang-ekonomiyang ugat ng gerang sibil.

Ipinaaresto siya noong 2007 sa gawa-gawang kasong ibinasura sa kalaunan dahil wala itong batayan. Tinatakan siyang “terorista” ng US at ng mga papet nito, isang akusasyong ibinasura sa korte sa Europe noong 2009. Paulit-ulit siyang inakusahang utak ng pagbomba sa Plaza Miranda (1971) kahit ibinasura na ito ng isang korte sa Maynila noong 1994 dahil walang ebidensya.

Walang makatatangi na sa kasaysayan ng Pilipinas, walang hihigit sa nagawa ni Ka Joma na pagpukaw sa sambayanang Pilipino para tumindig at lumaban. Milyun-milyong manggagawa, magsasaka, mga petiburges na intelektwal at mga ordinaryong kawani at propesyunal sa buong bansa ang nagbangon, nagkaisa at kumilos sa ilalim ng bandi-

lang pula at sulo ng rebolusyon. Lahat ng aktibistang pambansa-demokratiko, Pulang mandirigma at kadre ng Partido ay nagsimulang mamulat at maantig sa “Lipunan at Rebolusyong Pilipino” (LRP), ang pinakakomprehensibong pagsusuri sa kasaysayan at kalagayan ng bansa.

Dahil sa kanyang pangungulo, hindi mapapawing ambag, at pag-aalay ng buong buhay para sa pagsulong ng rebolusyong Pilipino para sa tunay na pambansang kalayaan at demokrasya, si Kasamang Jose Maria Sison ay isang dakilang bayani ng sambayanang Pilipino. Tunay siyang pinakadakila sa lahat.

Sa kanyang pagpanaw, iniwan ni Ka Joma sa Partido ang isang ginintuang baol ng kayamanang teorya ng rebolusyong Pilipino. Gamitin at ibayo natin itong pagyamanin sa praktika ngayon at sa hinaharap na pagsulong ng demokratikong rebolusyong bayan hanggang sa sosyalistang rebolusyon. Ang hindi mawawalang kinang nito ang magsisilbing tanglaw natin sa pagsulong sa masukal na landas. Panatilihing Pula ang kanyang dakilang alaala at pamana. Matatag na ipagpatuloy ang rebolusyong sinimulan niya kasama ang ating mga dakilang martir at bayani.

Magpakadalubhasa tayo sa mga


teorya at aral na iniwan ni Ka Joma. Isagawa natin ang kilusan para balik-aralan ang kanyang mga sulatin, mula sa LRP hanggang sa “Limang Bolyum” na koleksyon ng kanyang mga artikulo. Pahigpitin ang gagap sa Marxismo-Leninismo-Maoismo na siyang makauring paninindigan, pananaw at paraan ng pagsusuri at pag-iisip ni Ka Joma. Ang mahigpit na paggagap natin sa kanyang mga ideya at gabay ang isa sa susi sa ibayong pagsulong ng rebolusyong Pilipino sa darating na panahon.

Ang Partido Komunista ng Pilipinas ay dakila. Nang muli itong itatag ni Ka Joma, batid niya ang tungkulin ng Partido bilang taliba ng uring proletaryado na mamumuno sa yugto ng bagong demokratikong rebolusyon, at sa buong pangkasaysayang panahon ng sosyalistang rebolusyon tungo sa komunistang lipunan. Sasaklawin nito ang panahong higit sa buhay ng isang tao o ilang salinlahi.

Naging mapalad ang Partido na nagtagal ang buhay ni Ka Joma at mahigit anim na dekada na namuno at nagbigay-gabay sa praktikal na kilusan. Sa Ikalawang Kongreso noong 2016, nagbigay-pugay at pinasalamatan ng Partido si Ka Joma.

Sa panahong buhay si Ka Joma, ilang salin na ng mga kadreng kanyang sinanay ang tumangan ng pamumuno sa Partido. Tiyak na ilang salinlahi pa ng mga kadre ng Partido—marahil ang iba’y hindi pa ipinapananak—ang magbabasa at mag-aaral sa mga sulatin ni Ka Joma, kasama ang kina Marx, Engels, Lenin, Stalin, Mao, at yayakap at mamumuno sa dakilang simulain ng proletaryado.

Idineklara ng ating Komite Sentral ang sampung araw ng pagluluksa na magtatapos sa ika-54 na anibersaryo ng Partido. Ialay natin ang araw na iyon para magbigay pugay at dakilain ang alaala ni Ka Joma. Gamitin natin itong okasyon para sama-samang tumindig, at muling pagtibayin ang determinasyon na sumulong at panatilihing mataas na nagwawagayway ang Pulong bandila ng Partido at rebolusyong Pilipino.

<div></div> <div>Tomo LIII Blg. 24 Disyembre 21, 2022</div> <div>Ang Ang Bayan ay inilalabas sa wikang Pilipino, Bisaya, Iloco, Hiligaynon, Waray, Ingles at Espanyol. Tumatanggap ang Ang Bayan ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan.</div> <div>Ang Ang Bayan ay inilalathala dalawang beses bawat buwan ng Komite Sentral ng Partido Komunista ng Pilipinas</div> <div><div> ang.bayan@cpp.ph</div><div> @angbayan1969</div></div>	
<div>Nilalaman</div> <div><div>Editorial: Mabuhay ang alaala ni Ka Joma! Palakasin ang Partido at isulong ang rebolusyon! 1</div><div>Jose Maria Sison, 83 3</div><div>Walang tigil-putukan ngayong kapaskuhan 4</div><div>Protesta sa Araw ng Karapatang-tao 4</div><div>Kagubatan, nasira sa pambobomba ng AFP 4</div><div>Ang maayos na daan ng <i>dagyaw-alayon</i> 5</div><div>Hegemonya ng US sa Asia-Pacific 6</div><div>Aksyong punitibo sa Negros 6</div><div>Anim, minasaker ng 7th IB 7</div><div>Mga protesta 7</div><div>Mga panukalang MIF at MROTC, iniratsada 8</div><div>Sa madaling salita 9</div><div>Welga sa UK ngayong kapaskuhan 10</div><div>Makiisa sa mamamayan ng Peru 10</div></div>	

Jose Maria Sison, 83

Bumuhos ang mga pagpupugay, parangal at pagkilala sa dakilang lider rebolusyonaryo at tagapangulong tagapagtatag ng Partido Komunista ng Pilipinas (PKP), internasyunalista, patriyotiko at tagapamandila ng Marxismo-Leninismo-Maoismo na si Prof. Jose Maria Sison na pumanaw noong Disyembre 16. Payapa siyang pumanaw kapiling ang kanyang pamilya at mga kaibigan sa UMC Hospital sa Utrecht, The Netherlands alas-9:40 ng gabi sa Pilipinas. Siya ay 83. Naulila niya ang kanyang asawa at kapwa rebolusyonaryong si Juliet de Lima Sison, kanilang apat na anak at mga apo.

Si Ka Joma ay namatay matapos ang higit 2-linggong pananatili sa ospital. Ilang minuto bago ang kanyang huling hininga, ibinahagi pa niya kay Kasamang Julie ang kanyang katiyakang magtatagumpay ang rebolusyon at susulong ang sosyalismo. Hanggang sa dulo, nanatili siyang puno ng pag-asa para sa mamamayang Pilipino na buong-puso at determinasyon niyang pinaglingkuran.

Kasalukuyang nakahimlay ang kanyang mga labi sa Barbara Uitvaartverzorging Utrecht at maaaring bisitahin ng publiko mula Disyembre 18 hanggang 22. Magkakaroon ng mga aktibidad sa kanyang lamay tulad ng pagkanta, pagbabasa ng mga tula, pagpapalabas ng mga bidyo, pag-awit ng mga paboritong awitin ni Ka Joma at iba pa. Sa Disyembre 23, isasagawa ang araw ng pagpaparangal mula sa mga internasyunal na panauhin, kasama at kinatawan ng mga partidong pulitikal at organisasyon. Ihahatid ang kanyang mga labi sa Crematorium Daelwijck sa Disyembre 27.

Sa Pilipinas, idineklara ng Partido ang 10-araw na pagluluksa simula Disyembre 17 at inatasan din nito ang lahat ng yunit ng Bagong Hukbong Bayan (BHB) na magsagawa ng tahimik na *21-gun salute* bilang pagpupugay at pamamaalam.

Sa parangal ng Ikalawang Kongreso ng PKP, inialay nito ang pinakamataas na pagkilala at sundulang pasasalamat ng Partido kay Ka Joma para sa kanyang hindi matatawarang kontribusyon sa rebolusyong Pilipino bilang Tagapangulong Tagapagtatag ng PKP, tagapagtatag ng BHB at paghahawan ng landas sa

pagtataguyod ng Demokratikong Guberyong Bayan sa Pilipinas.


Sa Metro Manila, inilunsad ng iba't ibang ligal at demokratikong organisasyon ang kanilang parangal kay Ka Joma. Nagtipon-tipon sila sa University of the Philippines (UP)-Diliman, Quezon City noong Disyembre 19, mula ala-1 ng hapon hanggang hatinggabi, para sariwain ang buhay at pakikibaka ni Ka Joma bilang dakilang guro at tanglaw ng masang anakpawis.

Sa sumunod na araw sa parehong lugar, nagsama-sama ang higit 500 tagapagtaguyod ng kapayapaan at karapatang-tao para parangalan siya bilang tagapagtanggol ng kalayaan at proletaryong internasyunalista. Nakatakdang maglunsad ang mga grupong pambansa-demokratiko, sa pamumuno ng Bagong Alyansang Makabayan, ng isang malaking parangal pagtitipon sa susunod na mga araw.

Pagkilala, pagpupugay

Ipinaabot ng maraming organisasyon sa Pilipinas at sa magkakaiibang panig ng mundo ang kani-kanilang pasasalamat, pagkilala at pagpupugay kay Ka Joma sa kanyang naging ambag sa kanilang mga pakikibaka.

Nagpugay ang mga organisasyong lihim at rebolusyonaryo na alayado ng NDFP tulad ng Liga ng Agham para sa Bayan (LAB), Christians for National Liberation, Katipunan ng mga Samahang Manggagawa, Makibaka at iba pa. Naglabas din ng mga pahayag ang mga panrehiyong balangay ng NDFP at ang mga Komite ng Partido sa mga rehiyon.



Ipinaabot ng Komite Sentral ng Communist Party of India (Maoist) ang pakikiramay sa PKP at pagkilala kay Ka Joma. Anito, "Marami siyang naisulat sa mga ideolohikal na usapin na napakahalaga. Marami kaming natutunan mula rito." Pinagpugayan din siya ng Marxist-Leninist Party of Germany (MLPD), at ng Communist Party of Turkey-Marxist Leninist (TKP-ML) at armadong pwersa nitong TIKKO.

Nagbigay-pugay din ang mga partido komunista, partidong pulitikal at organisasyon mula sa Norway, Turkey, Kurdistan, United States, Australia, Romania, Russia, Spain, Portugal, Sweden, England, Indonesia, Ireland, China, Palestine, Canada at iba pang mga bansa.

Pinagpugayan din siya ng International League of Peoples' Struggle, sampu ng mga balangay nito sa buong mundo at kasaping organisasyon nito, na kanyang pinamunuan at itinatag noong 2001. Kinilala rin siya ng maraming mga naglimbag ng kanyang mga libro at sulatin.

Hindi mabilang na mga organisasyong pambansa-demokratiko ang napahayag ng kanilang pagpupugay kay Ka Joma. Mula sa balangay ng mga organisasyong kabataan, mga samahan ng maralita sa komunidad, mga magbubukid sa kanayunan, kababaihan, taong-simbahan, mga manggagawa at kanilang unyon, at marami pang iba, iisa ang sigaw nila: Ka Joma Lives! Mabuhay ang alaala ni Ka Joma! **AB**

Walang tigil-putukan ngayong kapaskuhan

I nianunsyo noong Disyembre 19 ng Komite Sentral ng Partido Komunista ng Pilipinas na hindi ito magdedeklara ng tigil-putukan ngayong kapaskuhan. Ayon sa Partido, "walang karason-rason para magdeklara ng tigil-putukan."

Nagpapatuloy ang mga operasyong militar at pag-atake ng Armed Forces of the Philippines (AFP) sa maraming komunidad sa kanayunan. Maraming barangay ang ipinaiilalim sa kanilang paghahari. Lagang ang pang-aabusong militar at paglabag sa mga batayang karapatan tulad ng pagbabawal sa mga magsasaka na magtrabaho sa kanilang mga sakahan, ililgal na panghahalughog sa mga kabahayan, ililgal na pang-aaresto, tortyur, pambobomba at istraping, pangangan-yon sa mga sakahan at kalapit na kagubatan, pwersahang pagpapasuko at marami pang iba.

Sa desperasyon ng rehimeng Marcos at armadong mga pwersa nito na "durugin" ang rebolusyonaryong kilusan, walang pakundangan ang paglabag nito sa mga karapatang-tao at internasyunal na makataong batas. Hindi bababa sa 45 ang biktima ng pampulitikang pamamaslang ng militar at pulis simula nang maupo sa poder si Marcos Jr. Higit 47,000 ang biktima ng mga paglabag sa karapatang-tao.

Sa ganitong diwa, binigyan ng Partido ng awtoridad ang Bagong Hukbong Bayan (BHB) na maglunsad ng mga taktikal na opensiba sa

darating na mga araw. Ayon sa Komite Sentral, "tungkulin ng BHB na armadong ipagtanggol ang mamamayan, maging ngayong kapaskuhan, at ngayong nasa gitna tayo ng pagluluksa sa pagpanaw ng ating pinakamamahal na si Ka Jose Maria Sison."

Inatasan nito ang hukbong bayan sa pamamagitan ng Pambansang Kumand sa Operasyon at mga Panrehiyon at Subrehiyong Kumand sa Operasyon na aktibong labanan at biguin ang kampanya ng armadong panunupil ng AFP."

Maaari magkonsentra ng pwersa ang BHB para patamaan ang nahihinala, mahihina at pagod na mga tropa ng sundalo at pulis at parusahan sila sa kanilang dumaraming krimen sa mamamayan. AB

Protesta sa unang Araw ng Karapatang-tao ni Marcos Jr

S inalubong ng mga protesta ng libu-libong mga Pilipino ang unang paggunita sa Internasyunal na Araw ng Karapatang-tao sa ilalim ng rehimeng Marcos Jr. Nagmartas noong Disyembre 10 mula sa Liwasang Bonifacio patungo sa Mendiola sa Maynila ang libu-libong raliyista para batikusin at papanagutin si Marcos Jr at armadong pwersa ng estado sa maraming mga paglabag sa karapatang-tao.

Sa pangunguna ng Karapatan at Bagong Alyansang Makabayan, nakapaglunsad ng mga aktibidad bago at sa mismong araw ng Disyembre 10 sa maraming bahagi ng Metro Manila. Inilunsad din ang mga protesta at pagtitipon sa mga syudad ng Baguio, Naga, Legazpi, Sorsogon, Kalibo, Roxas, Iloilo, Bacolod, at Davao. Nagkaroon ng katulad na mga aktibidad sa Ilocos Sur at Ilocos Norte, La Union, Kalinga, at Mt. Province. Nagtipon ang mga Pilipino sa United States, Canada, Europe, Hongkong at Australia.

Ayon sa Karapatan, nagpapatuloy ang kultura ng kawalang pakundangan sa ilalim ni Marcos Jr. Binatikos ng grupo ang kampanyang kontra-insurhensya sa kanayunan na nagreresulta sa malawakang pagbabakwit,

dislokasyon sa kabuhayan at buhay ng magsasaka, mga ililgal na pang-aaresto, pambobomba at istraping sa mga sibilyang komunidad at iba pa.

Dinala ng iba't ibang mga sektor ang kanilang mga panawagan sa mga protesta at aksyong masa. Sigaw ng mga manggagwa: Nakabubuhay na sahod, ipaglaban! Panawagan ng mga manggagawang pangkalusugan, mga guro at kawani ng guberno ang pagtataas ng kanilang sweldo. Nakiisa rin sa mga protesta ang kabataan at mga estudyante, taong-simbahan, kababaihan, mamamahayag, magsasaka at ibang demokratikong sektor.

Tinuligsa nila ang ayudang militar na ibinigay ng US sa rehimeng Marcos na ginagamit sa pagsupil sa mamamayan. AB

Kagubatan, nasira sa pambobomba ng AFP

NAGSAGAWA NG WALANG-patumanggang pambobomba ang Armed Forces of the Philippines (AFP) sa gitna ng kagubatan ng Mt. Hilong-Hilong sa hangganang bahagi ng Agusan del Sur, Agusan del Norte at Surigao del Sur noong Nobyembre 30. Mula alas-5:40 ng umaga hanggang alas-7 ng Nobyembre 30 ay binomba ang erya gamit ang anim na malalaking bomba at dalawang rocket.

Halos 100 mga puno ang nasira sa dito dulot ng pambobomba. Nag-iwan din ito ng malalaking butas sa lupa (crater) na may lalim na hanggang tuhod at nagdulot ng pagguho ng lupa.

Ang naturang kabundukan ay isa sa mga natitirang tirahan ng Philippine Eagle at maraming mga klase ng flora at fauna.

Ang maayos na daan ng *dagyaw-alayon*

Karaniwang inirereklamo ng mamamayan ng Barangay B, isang baryo sa Vi-sayas, ang pananakit ng kanilang katawan, laluna ng mga binti at paa. Tanya nila, sanhi nito ang init ng motorsiklo sa mahabang pagbyahe ng palay at iba pang produkto nila tungong pamilihan. Hindi maiiwasan na mabasa ng tu-big ang kanilang mga paa dahil sa uka-ukang daan na nagiging mumunting sapa kung tag-ulan.

Batid ng mga magsasaka na ang pananakit na ito ay hindi lamang usaping medikal kundi ng kapabaya-an ng bulok na gubyrno na ayusin ang sira-sirang kalsada tungo sa ka-nilang baryo. Napagtanto nilang ki-nurakot na ang milyun-milyong na-kalaan diumano para sa paglalalatag ng mga *farm-to-market road* na ipi-nagmamayabang ng AFP at NTF-Elcac.

Sa isang konsultahan, napagpa-syahan ng lokal na samahan dito na ayusin ang kanilang kalsada sa pa-mamagitan ng *dagyaw-alayon*, isang tradisyunal na porma ng mutwal na tulungan sa pagsasaka ng mahihirap na magsasaka. Iilan lamang ang su-mali sa umpisa pero di naglaon ay nakita rin ng iba ang bentahe para rito. Umabot sa 60–120 katao mula sa apat sa anim na sityo ang nag-ambag ng lakas-paggawa sa proyek-to.

Nagtayo ang mga magsasaka ng mga tim para tiyakin ang bawat tungkulin at antas ng proyekto. Sa bawat hakbang, tiniyak nilang duma-daloy ang demokrasya, napanganga-lagaan ang mga trabahador at napa-nanatili ang maayos na relasyon ng bawat isang sumasali sa *dagyaw-alayon*. Natiyak ng kababaihan, katu-wang ang mga bata sa baryo, na may sapat na pagkain ang mga kalahok. Mayroong tagagawa ng iskedyul ng mga kalahok at nagtitiyak na maayos ang hatian sa trabaho. May grupo din silang itinalaga para makipag-u-sap para kunin ang suport ng mga magsasakang mas nakaalwan sa bu-hay. Mayroon namang nangalap ng rekurso para sa proyekto.

Minsan sa isang linggo ang pag-*dagyaw-alayon* para sa pag-ayos ng kalsada. Tumitigil lamang sila kung marami ang gawain nila sa bukid o

kung naglulunsad ng panggulong operasyong kombatan ang pasistang militar at pulis. Maliban sa baong pagkain, nagdadala sila ng kagami-tan sa pagtrabaho tulad ng pala, asarol, itak at iba pa.

Naigiit ng mga magsasaka sa mga upisyal ng barangay na maglaan ng bigas at badyet pang-ulam para sa mga nagtatrabaho. Ang ilang may malalaking taniman ay nag-ambag ng isa hanggang dalawang sakong pa-lay. Nagbigay din ng pera para sa bi-gas at ulam ang mga dumadaang trak na naghahakot ng mga produk-tong agrikultural.

Kalakhan ng kalalakihang may hustong gulang ang nagtrabaho sa kalsada habang ang kabataan ang nag-iigib ng inuming tubig at iba pang gawaing inaatas sa kanila. Bago sila magtrabaho, nagpupulong muna sila upang pagkaisahan ang mga ga-gawin sa araw na iyon. Muling mag-pupulong ang lahat pagkatapos ng trabaho para matasa at makuha ang mga komentaryo.

Sa umpisa ay nagdalawang-isip ang ilang magsasaka dahil baka sala-kayin sila ng pulis at militar sa pagsi-sikap nilang ayusin ang kanilang ka-buhayan. Ngunit pinangibabawan ni-la ang takot dahil batid nilang wa-

lang iligal o kriminal sa kanilang gi-nagawa. Nakipag-ugnayan sila sa mga upisyal ng barangay para tiya-king hindi sila gagambalain. Kalau-nan, naisama na rin sa pagbayani-han ang ibang proyektong imprastruktura ng barangay.

Naging inspirasyon ang magan-dang karanasan ng Barangay B para sa katanging dalawang barangay. Sa Barangay A, kinumpuni sa pamama-gitan ng *dagyaw-alayon* ang mga kalsada para sa kanilang mga karo-sa, motorsiklo at trak sa paghakot ng mga palay, mais, tubo, pinya, gu-lay at iba pang produkto. Napakilos ang 30 hanggang 40 katao mula sa tatlo sa anim na sityo. Isang beses sa isang linggo ang kanilang bayani-han.

Sa Barangay K, sumali ang 50 hanggang 80 katao mula sa apat na sityo. Palay, mais, kamoteng kahoy at iba pang halamang ugat ang pro-dukto ng barangay. Dalawang beses isinagawa ang *dagyaw-alayon*, na noon ay sa ginagawa lamang sa mga sakahan, pero ngayon ay sinaklaw na rin ang iba pang gawain.

Breyktru sa mga magsasaka ang pagkumbinsi sa mga mas mataas na saray na magsasaka na lumahok sa *dagyaw-alayon*. Ang noo'y halos walang boses na mga maralita at mababang gitnang magsasaka ay mahinahon at masigasig ngayon sa pagpaliwanag, at nagawang kunin ang suporta ng mas mataas ang uri o saray na sa umpisa ay nagdadala-wang-isip pa.

AB



Hegemonya ng US sa mga ekonomya sa Asia-Pacific

Bahagi ng militaristang Indo-Pacific Strategy ng imperyalismong US ang pagpapalakas ng hegemonya nito sa mga ekonomya ng alyado at malakolonya nito sa Asia-Pacific. Tungo rito, inilunsad ni US Pres. Joseph Biden ang Indo-Pacific Economic Framework for Prosperity (IPEFP) bago ang pagpupulong ng Quadrilateral Security Dialogue (US, Japan, Australia, India) sa Japan noong Mayo. Isinagawa sa Australia ang unang pagtitipon ng mga upisyal sa ekonomya ng 14 bansang kasapi nito noong Disyembre 10-15.

Lantad na layunin ng IPEF ang kontrahin ang pamamayagpag ng imperyalistang China sa rehiyon. Liban sa India at US, lahat ng mga kasapi ng IPEFP ay myembro rin ng Regional Comprehensive Economic Partnership (RCEP) at may malalakas na ugnayang kalakalan sa China. Balak ng US na rendahan ang kalakalang ito at agawin sa China ang mga bentahe nito sa pandaigdigang kalakalan, laluna sa pagmamanupaktura ng *semiconductor*. Sa panahon ding ito, nais nitong pahigpitin ang kontrol sa mga rekurso, pamilihan at lagakan ng sobrang kapital sa Asia-Pacific.

Bagamat itinutulak bilang “partnership” (o pagtutuwangan) walang pinag-iba ang IPEFP sa binitawan ng US na Trans-Pacific Partnership at ibang multilateral na kasunduang sumira sa mga atrasado at malakolonyang bansa at nagbansot sa kanilang pag-unlad. Itutulak nito ang mga bansa na lalupang ibuyangyang ang kani-kanilang mga ekonomya kapalit ng limitadong kapital. Dagdag din itong instrumento ng US para ipataw ang mga tuntunin at prosesong pabor sa mga kumpanya at pamumuhunang Amerikano sa rehiyunal na pamilihan habang pinananatiling sarado ang sariling ekonomya.

Maraming bansa ang umaalma sa mga tuntunin ng IPEFP at hakbangin ng US na tahasang lumalabag sa kanilang soberanyang pang-ekonomya. Kamakailan, inianunsyo ng US ang bagong mga reskripsyon sa mga kumpanyang Amerikano sa pagluluwas ng materyal na may kaugnayan sa produksyon ng mga *computer chip*. Itinulak nito ang South Korea at Singapore na magpataw ng katulad na reskripsyon. Sa larangang ito (kalakalan), nagbabala na ang Indonesia, Thailand at ang India na hindi ito papayag na gamitin ang IPEFP para may bansang “nakahiwalay.” Tahasang tumanggi ang mga ito na isakripisyo ang kanilang ugnay sa China.

Todong pangangayupapa ng rehimeng Marcos

Di katulad ng mga bansang nagtataguyod ng kasarinlan sa ekonomya, nagkukumahog ang tutang guberno ni Marcos na magpailalim sa

IPEFP. Nakaayon dito ang patakaran ng rehimen na “bukasan nang todo ang pinto” sa lokal na ekonomya sa dayuhang pandarambong kapalit ang kakarampot na kapital at bahagi sa merkadong Amerikano.

Balak ng US na itayo ang upisina ng US Trade and Development Agency (USTDA) sa Metro Manila para palakasin ang kontrol nito sa mga patakaran at proyektong pang-ekonomya sa Asia-Pacific. Sa Pilipinas, padudulasin ng ahensyang ito ang pagkopo ng mga kumpanyang Amerikano sa kabubukas na sektor sa pampublikong yutilidad, telekomunikasyon, mga proyektong imprastruktura at pang-enerhiya at ekspansyon ng mga minahan at komersyal na plantasyon.

Kabilang sa mga popondohan ng US ang dalawang mapaminsalang proyekto na ipinagmalaki pa ni ng bise presidente nito na si Kamala Harris noong bumisita siya sa bansa. Isa rito ang *geothermal project* sa Mt. Apo sa North Cotabato kung saan kasosyo ng USTDA ang Energy Development Corporation (EDC) ng pamilyang Aboitiz. Isa pa ang *nickel* at *cobalt* processing facility kasosyo naman ang Eramen Minerals Inc. (EMI) sa Zambales.

Mahaba at madugo ang naging paglaban ng mga magsasaka at Lumad sa mga proyektong ito. Dislokasyon sa mga magsasaka at Lumad at pinsala sa kapaligiran ang idinulot ng dalawang proyekto. Iligal na itinayo ang mga *geothermal plant* ng EDC sa lupang ninuno ng mga Manobo sa Mt. Apo, na isang protektadong lugar. Ang mga operasyon naman ng EMI ay minsan nang ipinasa ng Department of Environment and Natural Resources dahil sa mapaminsalang epekto nito sa komunidad. Parehong taliwas ang mga proyekto sa bukambibig ng US na “kasaganaan” at pangagalaga sa kapaligiran na bahagi ng “pagkontra sa *climate change*.”

AB

Aksyong punitibo sa Negros

DALAWANG TRAK NG malaking kumprador at panginoong maylupa na si Teotimo Ballesteros ang sinunog ng mga operatiba ng Bagong Hukbong Bayan-Northern Negros sa Sityo Proper, Barangay Tabun-ac, Toboso, Negros Occidental noong Disyembre 14, bandang alas-9:30 ng umaga.

Si Ballesteros ay isang notoryus na kontra-rebolusyonaryo at *landgrabber*. Sa kanyang kalupitan, gwardyado ng mga bandidong grupo at militar ang kanyang mga tubuhan. Pinondohan niya ang mga ito para mapanatili ang kanyang kontrol sa lupang kanyang inagaw mula sa mga magsasaka. Kilala siya na barat magpasahod at malupit sa kanyang mga sakada kung kaya't lubos na ikinagalak ng mga tapasero at manggagawa sa tubuhan ang pagparusa sa kanya.

Anim, minasaker ng 7th IB sa Sultan Kudarat

Brutal na minasaker ng mga sundalo ng 7th IB ang limang Pulang mandirigma at isang sibilyan sa Sityo Mugti, Barangay Chua, Bagumbayan, Sultan Kudarat noong Nobyembre 23. Walang engkwentrang naganap matapos magdesisyon ang limang Pulang mandirigma na hindi makipagpalitan ng putok dahil nasukol sila habang maraming sibilyan sa kanilang paligid.

Pilit mang itinatangi ng Armed Forces of the Philippines, hindi nila maitatago ang karumal-dumal na pagpatay at paglapastangan ng 7th IB sa mga biktimgang sina Indot Dulunan (Ka Dennis), Sep Kasa (Ka Ho), Allan Dalimbang (Ka Duran), Annabel Talon (Ka Elena), at Ka Pogi at sibilyang si Gerry Kasa.

Ayon sa mga nakakita sa mga bangkay, may mga palatandaan na pinahirapan at binaril ng malapitan, ang anim na biktima. Labag sa mga tuntunin ng digma ang pagpatay sa mga kombatant na sumurender at wala na sa katayuang lumaban.

Panganganyon. Sa Buenavista, Agusan del Norte, tatlong ulit na nang-istraping at nanganyon ang 23rd IB sa tatlong barangay nitong huling kwarto ng 2022. Nagbunga ito ng malawakang ligalig at paggambala sa mga komunidad at pagkasira ng mga sakahan. Nasugatan sa isa sa mga insidente si Juanito Junaldo, isang magsasaka na nasa kanyang sakahan sa Barangay Lower Olave noong Disyembre 2. Noong Nobyembre 5, pinatay ng mga sundalo si Rene Villa at pinalabas na Pulang mandirigmang nasawi sa isang gawa-gawang engkwentro.

Pag-aresto. Walang mandamyento at iligal na inaresto ng hindi nakaunipormeng tauhan ng 10th ID ang maralitang magsasaka at drayber ng habal-habal na si Danilo Antumikay noong Disyembre 10, ala-1 ng hapon. Dinampot si Antumikay sa Barangay Tugaya, Valencia City. Sa takot na may mangyari kay Antumikay, sumama sa kanya ang kanyang asawa at kanilang 2-taong gulang na anak.

Atake sa pamamahayag. Kabilang pagkundera ang sumalubong sa hatol ng isang korte sa Quezon City noong Disyembre 12 na

“nagkasala” ang mamamahayag na si Frank Cimatu sa kasong *cyberlibel*. Ayon sa mga mamamahayag, pinagtitibay ng hatol na ito ang “chilling effect” na kinahaharap ng mga mamamahayag sa bansa. Panawagan nila ang pagbabasura sa mga batas sa *libel* lalupa’t ginagamit lamang ito para ikulong ang mga mamamahayag ng ibinubunyag nilang maruruming pulitiko at atakehin ang karapatan sa malayang pamamahayag.

Pwersahang pagpapasunder. Kinundena ng La Union Peace and Justice Advocates noong Disyembre 4 ang pwersahang “pagpapasurender” sa mga myembro ng balangay ng Timpuyog dagiti Marigrigat nga Umili iti Naguilian sa San Antonio at balangay ng Timek ken Namnamma dagiti Babassit a Mangngalap iti La Union sa San Nicolas West sa Agoo. Naganap ang mga insidente noong Nobyembre 26, kung saan pinilit ng mga pulis ang mga lider ng dalawang grupo na magsumite ng listahan ng kanilang mga myembro at pumirma sa mga dokumentong nagsasabing “iniaatras” nila ang kanilang suporta sa nabanggit na mga organisasyon.

Militarisasyon sa Mindoro. Iniulat ng National Democratic Front-Mindoro ang 29 na kaso ng paglabag sa karapatang-tao ng 203rd IBde sa Rical at Calintaan sa Occidental Mindoro sa buwan ng Nobyembre.

Kabilang dito ang 13 kaso ng pagkakampo sa mga eskwelahan, simbahan at *barangay hall*; pitong kaso ng pambubugbog, apat na kaso ng pagbabanta, tatlong kaso ng iligal na panghahalughog, dalawang kaso ng istraping, at tig-isang kaso ng iligal na pang-aaresto at detensyon, pwersahang pagpapasuko at sapilitang ebakwasyon.

Samantala, pansamantalang nakalaya si Elmer Forro, pangkalahatang kalihim ng Bayan-Panay noong Disyembre 10 matapos magbayad ng pyansa.

AB

Defend Louie Jalandoni. Nagpiket sa harap ng DoJ sa Maynila noong Disyembre 9 ang grupong Defend Louie Jalandoni para ipabasura ang pagsama sa dating punong negosyador ng NDFP sa arbitraryo at walang batayang listahan ng mga “terorista” ng Anti-Terrorism Council.

Black to Block MROTC. Suot nang mga damit na itim, nagprotesta ng mga grupong kabataan sa harap ng University of Sto. Tomas sa Maynila laban sa pagpasa ng panuklang NCSTP/MROTC noong hapon ng Disyembre 15. Nagprotesta rin sila sa harap ng Kongreso noong Disyembre 12 habang nakasalang sa pagdinig ang panukala.

Protesta kontra Marcos sa Europe. Nagsagawa ng mga pagkilos ang mga grupong migrante sa Europe noong Disyembre 14 at 15 bilang pagsalubong kay Marcos Jr. Nasa Belgium siya noon para dumalo sa pagpupulong ng mga lider ng bansa mula sa European Union at ASEAN.

Barikada sa Bacolod. Nagbarikada ang mga residente ng Purok Katilingban, Barangay Punta Taytay, Bacolod City para pigilan ang demolisyon sa 40 kabahayan sa lugar. Iligal ang demolisyon lalupa’t hindi ang may-ari ng lupa ang nag-utos nito kundi ang tenante lamang.

Mga panukalang MIF at MROTC, iniratsada sa Kongreso

Iniratsada ng mga alipures ng rehimeng Marcos sa Mababang Kapulungan ang mga panukalang Maharlika Investment Fund (MIF) at Mandatory ROTC (inilusot bilang National Citizens Service Training Program Act o NCSTP) sa huling araw ng Kongreso para sa taon noong Disyembre 15. Napa-iksi ang proseso ng "deliberasyon" matapos ginawang prayoridad ang mga ito ni Ferdinand Marcos Jr. Walang katumbas na panukala ang mga ito sa Senado.

Inihapag ng mga kamag-anak ni Marcos Jr (anak, pinsan at kanyang asawa) ang panukala para likhain ang MIF (House Bill 6398) noong Nobyembre 28. Suportado ito ng mga "tapangasiwa sa ekonomya" ng rehimen. Inulan ng batikos ang panukala dahil sa plano nitong gamitin bilang paunang pondo ang pinaghi-rapang pensyong nakalagak sa GSIS at SSS. Nanguna sa pagtutol ang mga manggagawa at kawani at kanilang mga kinatawan sa Kongreso. Umalma ang mga akademiko, at kahit ang mga neoliberal na ekonomista at negosyante.

Batid ng lahat na magiging balon lamang ng korapsyon ng pamilyang Marcos, kanilang mga kroning negosyante at mga alipures sa Kongreso ang MIF. Kilala ang mga Marcos sa buong mundo bilang mga mandarambong at magnanakaw ng pondo ng bayan. Pinaglalarawan ng mga ito ang unang itinayang ₱275 bilyong paunang pondo at ₱618 maaaring malikom nito sa susunod na mga taon.

Dahil sa mga batikos, tinanggal sa listahan ng pagkukunan ng pondo ang GSIS at SSS, at ang natira na ay ₱110 bilyon na kukunin sa Landbank

of the Philippines at Development Bank of the Philippines. Naibalita ring ibebenta ng rehimen ang walong pampublikong ari-arian, kabilang ang Basay Mining na may reserbang mineral na nagkakahalaga ng ₱102.8 bilyon. Balak din nitong kopohin ang kita ng mga kasino, haywey at paliparan.

Malinaw na walang "sobrang pondo" ang Pilipinas. Makasaysayan ang taas ng depisito nito sa pinansya at gahigante ang utang nito. Ipinunto kahit ng mga neoliberalista na wala ang mga kundisyon sa mundo para lumago ito. Katunayan, nangandalugi ang mga "sovereign wealth fund" kahit ng bansang tunay na may "sobrang pondo" tulad ng Taiwan, Singapore at Norway dahil sa matinding krisis na bumabayo sa pandaigdigng sistema ng kapitalismo.


Sa Pilipinas, naging kasingkahugan ng korapsyon ang mga "sovereign fund" at katulad na pondo. Kabilang dito ang mga pondong nilikha ng ama ni Marcos Jr sa dekada 1970 na naging mga palabigasan ng kanyang pamilya at kroni. Isang halimbawa rito ang *coco levy fund* na itinatag para pwersahang likumin

ang kakarampot nang kita ng maliliit na magniniyog. Sa ibang bansa, kamakailan ay hinatulang nagkasala ng pandarambong at *money laundering* ang *prime minister* ng Malaysia dahil sa paggamit niya sa *sovereign fund* ng bansa bilang personal na bangko.


Bingi sa lahat ng mga pagtutol dito, ipinasa ang panukala sa botong 279-6 matapos lamang ang 18 araw. Liban sa tatlong kinatawan sa ilalim ng Makabayan, dalawang kongresista mula sa Bicol at isang mula sa Basilan ang tanging bumoto laban dito.

Kasabay na ipinasa sa parehong araw ang NCSTP (House Bill 6486) na nabuo matapos konsolidahin ang 27 hiwa-hiwalay na panukala para ibalik ang pwersahang pagsasanay-militar ng kabataan (Reserved Officers Training Course o ROTC.) Ayon sa mga grupong kabataan, may mas masasahol itong probisyon kumpara sa unang mga panukalang tinutulan nila. Direktang pangangasiwaan ng pasistang Armed Forces of the Philippines ang mga pagsasanay, na maaaring magtagal nang dalawang taon. Itutulak nito ang militarisasyon ng mga paaralan, labag sa kalayaang pang-akademiko. Labag din ito sa mga karapatang estudyante, na pupwersahing magsanay kahit wala pa sila sa tamang edad. Ayon sa mga estudyante, perwisyo at pahirap lamang ang NCSTP/MROTC dahil sa dagdag na matrikula at gamit.

Dagdag sa dalawang panukala, nakahanay sa Kongreso ang walong panukalang pagbabago sa konstitusyon sa pamamagitan ng pagpapatawag ng Constitutional Convention. Naglalayon ang mga ito na magkaroon ng pagbabago sa dayuhang pagmamay-ari ng lokal na mga negosyo. Dahil sa maagap na pagbabantay ng oposisyon, napaliban sa Enero 26, 2023 ang susunod na pagdinig para rito.



₱2,458



presyo ng pagkaing pang-**noche buena** ngayong taon, mas mataas nang 25.7% kumpara noong 2021 at malayo sa **₱500** ipinagpipilitang pagkasyahin para sa 5-kataong pamilya.

Pinagkunan: Noche Buena Price Index, Department of Trade and Industry

36.7%

lamang sa mga Pilipino ang may tinatamasang minimum na isang proteksyon o benepisyong panlipunan.

Pinagkunan: World Protection Report 2022-2022, International Labor Organization

₱5.268T

pambansang badyet para sa 2023 na ipinasa nang halos walang ginalaw sa orihinal na mga alokasyon, kabilang ang pondong pang-intelligence at confidential (o lihim) na gamit.




₱1.4M

sobra-sobrang pyansa na itinakda ng korte para sa pansamantalang paglaya sa mga aktibistang sina **Reina Mae Nasino, Ram Bautista** at **Alma Moran**.



51%

o 316,405 mga Pilipinong **nars** ang nagtatrabaho sa ibang bansa dulot ng kawalan ng lokal na trabaho, barat na sahod, kulang na benepisyo at di makataong mga kundisyon sa paggawa.



82%

o 131 milyon sa 158.6 milyong aktibong SIM card ay prepaid o di rehistrado at may panganib na maputulan ng serbisyo oras na ipatupad ang **SIM Card Registration** sa Disyembre 27 kung hindi mairehistro.

25,000

drayber ng trak sa South Korea ang **nagwelga** nang 3 linggo para manawagan ng dagdag-sahod at mas maayos na mga kundisyon sa paggawa.

Daan-daang libong manggagawa sa UK, naglunsad ng mga welga sa kapaskuhan

Ikinasa ngayong Disyembre ng mga unyong manggagawa sa iba't ibang sektor ng United Kingdom ang kani-kanilang mga welga para sa disenteng sahod at makataong mga kundisyon sa paggawa. Tinatayang aabot sa 500,000 hanggang isang milyong manggagawa ang magwewelga hanggang sa katapusan ng taon. Bahagi ang mga ito sa pagsiklab ng mga pakikibaka ng mga manggagawa sa bansa mula pa Hunyo. Ayon sa The Guardian, nasa 1.1 milyong *workdays* na ang nawala sa pagitan ng Hunyo at Oktubre dulot ng mga pagkilos ng mga manggagawa.

Noong Disyembre 13, inilunsad ng 40,000 kasapi ng National Union of Rail, Maritime and Transport Workers (RMT) ang kanilang welga laban sa barat na pasahod. Ibinasura ng mga manggagawa sa riles ang alok ng mga kumpanya na 5% na dagdag-sahod para sa 2022 at 4% para sa 2023. Tinawag nilang “substandard” ang alok, laluna sa harap ng nagtataasang gastos sa pamumuhay sa bansa.

Pinagagana ng RMT ang 14 na kumpanyang nagpapatakbo ng mga tren. Inilunsad nila ang unang bwelo ng welga noong Disyembre 13 at 14, at ang pangalawang bwelo sa Disyembre 16 at 17. Itutuloy nila ang

mga pagkilos hanggang sa 2023.

Noong Disyembre 15, inilunsad ng 100,000 nars sa England, Wales and Northern Ireland ang kauna-unahang pambansang welga ng mga nars sa United Kingdom. Hiling ng Royal College of Nurses ang 19% na umento at dagdag na mga nars sa mga ospital para matiyak ang kaligtasan ng mga pasyente. Bahagi sila ng pampublikong sistemang pangkalusugan (National Health Services o NHS) na ilang taon nang nagdurusa sa mababang pasahod, sobra-sobrang pagtatrabaho at di sapat na subsidyo mula sa estado. Isa pang 24-oras na welga ang inilunsad noong Disyembre 20.

Kaagapay ng mga nars ang 10,000 drayber ng ambulansya, paramedik at iba pang manggagawang pang-emerdyensi, na nakatakdang magwelga sa Disyembre 21 at 28. Nilalabanan nila ang pagtanggig ng NHS na ibigay ang 4% dagdag-sahod na inaprubahan na ng kanilang gubyerno.

Bago pa ang Disyembre, nagsasagawa na ang mga manggagawa ng Royal Mail (koreyo) at University and College Union (mga guro at ibang istap akademiko) na kumakatawan sa 150 unibersidad ng mga piket at welga. Noong Disyembre 5, nagwelga ang 1,000 gwardya ng mga bangko at institusyong pinansyal.

Sa Scotland, nagkasa ng 2-araw na welga ang Scottish Secondary Teachers Association at iba pang unyon ng mga guro. Sa London, handang magwelga ang 2,000 drayber ng bus dahil sa patuloy na pagtanggig ng kanilang mga kumpanya para sa mas katanggap-tanggap na dagdag-sahod.

Sa nakaraang dekada, halos wala, at kung meron man, nakapaminimal nang itinaas ng sahod ng mga manggagawa sa UK. Ito ay habang tuluy-tuloy ang pagtaas ng kanilang bayarin sa pabahay at mga serbisyo at mga presyo ng bilihin. Noong Abril, bumagsak nang 3% ang tunay na halaga ng kanilang mga sahod dahil sa 10.1% implasyon. Lalu pa itong bumagsak pag-sapit ng Oktubre kung saan itinala ang 11.1% tantos ng implasyon. Nangangamba ang mga ekonomista ng bansa na sisirit pa ito tungong 18% sa susunod na taon.

Makiisa sa mamamayan ng Peru, panawagan ng ILPS

DALAWANG LINGGO NANG nagpuprotesta ang mamamayan sa Peru laban sa “kudeta sa parlamento” na nagpatalsik sa halal na presidente ng bansa na si Pedro Castillo noong Disyembre 7. Natanggal sa pwesto si Castillo matapos i-impeach ng isang “maka-Kanang” Kongreso. Pinangunahan ang mga protestang ito ng mga unyong agraryo, mga kilusan ng magsasaka, katutubo at iba pang demokratikong sektor. Panawagan nilang ibalik sa pwesto si Castillo, lusawin ang Kongreso at buuin ang Constituent Assembly para buuin ang bagong konstitusyon. Lubos nilang itinatakwil ang kasalukuyang konstitusyon na nakabalangkas sa neoliberalismo.

Sa harap nito, nanawagan ang komite ng International League of People’s Struggles para sa Latin America at sa Carribean sa lahat ng mga anti-imperyalistang pwersang demokratiko sa rehiyon na makiisa at sama-samang mag-alsa kasama ang mga manggagawa at mamamayan ng Peru. Hinikayat nito ang mamamayan na “sumunod sa mga yak ng nag-alsa nang mga mamamayan ng rehiyon,” katulad ng sa Argentina, Chile, Ecuador at Colombia. Sa mga ito tinangka ng mamamayan na “igpawan ang mga limitasyon ng tinawag na popular at maka-Kaliwang mga gubyerno na matagumpay na banggain ang mga plano ng naghaharing uri, at bigyan-daan ang pambansa at panlipunang paglaya sa ating mga bansa.”